

## Communicaziuns per Falera e Laax

### Dumengia dils malsauns Dumengia, ils 7 da mars

Nus lein seregurdar da nos malsauns el vitg ed ordeifer nossa pleiv e tar-metter a tuts buns giavischs per bien migliurament. Possies Vus retscheiver dalla cuminonza ils segns da carezia, engrazieivladad ed attaschonza per tut quei che Vus haveis regalau als con-carstgauns.

### S. Messa cun il sacrament dall'uncziun

**Mesjamna, ils 10 da mars a Falera  
Gievgia, ils 11 da mars a Laax  
mintgamai allas 14 uras**

Cordial beinvegni a tuttas parochianas e tuts parochians al survetsch divin cun il sacrament dall'uncziun. L'uncziun vul porscher forza, confiart e speranza ella veta da mintgagi, denton era perseveronza en gis da malsogna e maldispostadad.

Muort la situaziun actuala entras il coronavirus stuein nus deplorablamein desister uonn sin l'usitada stiva da caffè suenter messa.

### Vendita da rosas

**Sonda, ils 20 da mars  
naven dallas 9 uras  
a Falera ed a Laax avon il Volg**

Cun cumprar ina rosa – ni uonn schizun ina tschugalata – saveis Vus porscher agid pil dretg sin nutriment per carstgauns che ston viver en pupira. Gia ordavon in sincer «Dieus paghi» per Vossa generusadad.

### Unfrenda da Cureisma

L'unfrenda da Cureisma vegn rimnada uonn ils suandonts gis:

**a Falera:**

**Dumengia da palmas, ils 28 da mars  
a Laax:**

**Vendergis sogn, ils 2 d'avrel**

Ils zatgets per l'unfrenda sco era ils cenders da Cureisma 2021 ein sco mintg'onn deponai en baselgia.

### S. Messa da laud

Deplorablamein sa la messa da laud ch'era planisada per dumengia, ils 21 da mars buc vegnir menada atras, quei muort absenza dil plevon hospitant.

### Gi da suppa

Muort la situaziun actuala entras il coronavirus stuein nus deplorablamein era annullar uonn la tschavera da suppa comunabla. Nus sperein ensemen cun Vus ch'igl usitau gi da suppa sappi puspei vegnir menaus atras igl onn proxim.

### Collecta da Pastgas

Ord ils motivs enconuschents savein nus deplorablamein era buc menar atras uonn nossa collecta da Pastgas cun ils affons. Per tuttina saver sustener l'organisaziun caritativa «Terre des hommes» han ils scolars dalla scolaviva zambergiau per Vus aungnels. Quels vegnan deponai naven da mesjamna, ils 31 da mars tochen gliendisg Pastgas, ils 5 d'avrel en baselgia sper la cassa d'unfrendas. Sco engraziament per voss'unfrenda astgeis Vus prender aschia in aunghelet a casa.

Cordial engraziament gia ordavon per Vossa generusadad

*las catechetas ed ils scolars*

## Communicaziuns per Laax

### Survetsch divin commemora-tiv pil 150avel da sur Flurin Camathias

**Dumengia, ils 7 da mars  
allas 10.15 uras**

Flurin Camathias ei naschius ils 6 da mars 1871 e morts ils 3 da fevrer 1946. Sin pervenda eis el staus a Breil, Andiast e Siat.

Uonn eis ei 150 onns dapi la naschientscha da nies scribent e poet da Laax. El vala sco in dils pli impurtonts poets romontschs, ha schau anavos dabia fastitgs e perquei eis ei pli che mo indicau che nus seregurdein dad el duront quei onn giubilar. Denter las numerusas personas ed instituziuns che contribueschan e participeschan allas festivitads anflein nus era la pleiv da Laax. Per aschi da dir buna-mein per lantschar igl onn giubilar envida

ella lu era dumengia, ils 7 da mars 2021, ad in survetsch divin commemorativ. Ses interess sco scribent ein buca mo serestrinschi sin texts litterars. Era la teologia, la filosofia, problems da pastoraziun, d'instrucziun ed educaziun religiosa ha interessau el. Tgi enconuscha per exempel aunc ses cudischs d'oraziun: «Nies car Salvader», «Sontgas fiastas» ed auters? Flurin Camathias ha regalau a nus biaras canzuns ed ei era seprofilaus sco (co)autor da cudischs da canzuns. Da menziunar ei per exempel l'emprema «Cecilia» (1917). Quei cudisch da canzuns da baselgia ei vegnius duvraus tochen 1982, igl onn ch'el vegn remplazzaus entras igl «Alleluja». Ina stretga relaziun tgirava Flurin Camathias era cun scolast Barclamiu Coray (1896–1970), duront biars onns dirigent dil Chor viril da Laax, per il qual el ha adina puspei furniu texts. La canzun «Salid sper la fossa» ei ina da quellas cun la quala il Chor viril da Laax pren aunc oz cumiau sin santeri d'in camerat defunct.



*Sur Flurin Camathias, scribent, poet, plevon e canoni.*

Il program da detagl digl onn giubilar ei d'anflar sin la pagina d'internet dalla fundaziun Pro Laax.

*Erwin Ardüser*

### Radunonza generala dalla Pleiv roman-catolica

**Vendergis, ils 26 da mars  
allas 20 uras ell'aula Grava**

Nus envidein cordialmein tuttas parochianas e tuts parochians alla radunonza generala.

Il quen annual san ins retrer sin canzlia communal ni tier il secretariat dalla pleiv.

Nus sperein sin stedia participaziun ed engraziein gia ordavon per Vies interess.

*la supraponza*